

2019-imi akileraarutitigut ilanngaatisat il.il. imatut angissusilerneqarnissaannik Inatsisartut aalajangiinissaannik siunnersuut:

1. Inummut ilanngaat.....kr. 48.000 (ukiumut)
2. Ilangaat aalajangersimasoq.....kr. 10.000 (ukiumut)
3. Aningaasarsiat B-t akileraaruteqaataasussaannigitsut..kr. 5.000 (ukiumut)
4. Killilimmik akileraartussaataasut ilanngaataat.....kr. 1.000 (ukiumut)
5. Kommunitut ataatsimut akileraarut.....6%

Akissuteqaat

(Aningaasaqarnermut Naalakkersuisoq)

Aappassaaneerinnineq

Aningaasaqarnermut Akileraartarnermullu Ataatsimiititaliap 2019-imut akileraarutitigut ilanngaatisat pillugit aalajangiiffigisassatut siunnersuutip aappassaaneerneqarneranut atatillugu isumaliutissiisutaa Naalakkersuisut qujassutigaa. Ataatsimiititaliap isumaqatigiittup siunnersuutip akuersissutigineqarnissaannik inassuteqarnerat Naalakkersuisut iluarisimaarpat.

Aningaasaqarnermut Akileraartarnermullu Ataatsimiititaliap sulinermit ilanngaammik atulersitsinissamut atatillugu qaqugu aningaasaqarnikkut naapertuuttumik periarfissaqarumaarnera ilimagineqarsinnaanersoq Naalakkersuisunit erseqqissaatigineqassasoq kissaatigaa.

Sulinermit ilanngaammik ukioq 2019-imi siunnersuummik saqqummiisoqarnissaa naalakkersuisooqatigiinnissamik isumaqatigiissummi partiit Naalakkersuisuutitaqartut kissaatigaa. Sulinermit ilanngaatip siunertaraa sulinermit aningaasarsiaqarluni isertitaqarneq pisortanik ikiorsiissuteqarnermit pilerinarnerulernissaa. Sulinermit aningaasarsiaqarluni isertitaqarnerup pilerinarsarneqarnissaani sulinermit ilanngaat aqqutigalugu imaluunniit sulinermit tapit aqqutigalugit anguneqarsinnaanersoq pingaarnerunngilaq. Siunnerfigisaq pingaarneruvoq; qanoq anguneqarnissaa pingaarnerunani.

Sulinermit akissarsiallit akissaatikitsut akunnattumillu isertitallit sulinermit ilanngaammik ukiumut 12.000 kr-inik qaammammulluunniit 1.000 kr-imik naleqartumik akileraarnikinnerulersinneqassappata, siusinnerusukku naatsorsuinerit sulinermit ilanngaat tamakkiisumik atuutilersinneqarpat, kinguneqaataasumillu sunniutit eqqaanagit, tamatuma ukiumut akileraarutitigut isertitat Nunatta karsianut kommunitnullu ataatsimut 300 mio. kr-it missaannik annikilleriarnissaat takutippaat, piumasarineqassaarlu akileraartarnermit aqqissuussinermit ilaannakortumik aningaasaliisoqassanngitsoq. Aningaasani taaneqartuni ilanngaatip annertussusaa killiliussallu qanoq aalajangersarneqarnerat soorunami apeqqutaassaaq. Sulinermit ilanngaammik aningaasaliinissamut aningaasaleeriaatsit assigiinngitsut Naalakkersuisunit misissoqqissaarneqarput. Suliaq naalakkersuisoqarfiit arlariit akornani ataatsimoorullugu suliarineqarpoq.

Sulinermi ilanngaat eqqunneqareernerani inuiaqatigiinni aningaasaqarnerup patajaatsuuginnarnissaa soorunami Naalakkersuisunit pingaartinneqarpoq. Mittarfiliortiterinissat aningaasaqarnikkut kinguneqaataasumik sunniutit kingunerisassai ilanngullugit aningaasaqarnikkut naapertuuttumik periarfissaqarumaarneri ilanngullugit nalinersorneqartariaqassapputaaq.

Taaneqartutut annertussusilimmik sulinermi ilanngaammik atulersitsinermi aningaasanik atugassanik nassaartoqarsinnaanerani soorunami tullerriarinerit Inatsisartut Naalakkersuisullu aningaasanut inatsisissani aggersuni pingaarnersiuiumaarnerat soorunami apeqqutaassaaq.

Ukioq 2019-imut Naalakkersuisut aningaasaqarnermut inatsisissatut siunnersuusiaanni, imaluunniit tassunga allannguutissatut siunnersuusiami, siuliani taaneqartutut sulinermi ilanngaatiq ukiuni aningaasanut inatsiseqarfiusuni tulliuttuni aningaasassaqartinneqarnerisooq, imaluunniit qanoq aningaasalersorneqarsinnaanera saqqummiunneqarumaarpoq.

Tamakku saqqummiullugit siunnersuutip akuersissutigineqarnissaa Naalakkersuisut inassutigaat.